

[www.BibleForChildren.org](http://www.BibleForChildren.org)

# Matei 8



Lisoba la tatu kwabia nu kutogule ndoa ku Musi uku Kana, ku nkoa uku Galilaya. Amabaka Yesu nabombi babii, najombi Yesu babii bunkokiki ku kutogule ndoa pamu na banafunzi baki.



Divai ejajomuka, amabaka Yesu bumpwagila,  
“Ngaseabi na divai!” Ndienu amabaka Yesu baapwagila  
atumisi, “Lokapi lejwaampwagila, mwihengaje.”



Yesu jaapwagila atumisi, "Ntwelakiya milundu jenze masi." Nabombi batwelakiya twee. Ndienu Yesu jaapwagila, "Nteka henu masi haga mupelakiya nkolongu wa tipati ga ndoa."



Batenda ngati Yesu ejalagalakiya, nkolongu jola ejaonza masi gala kumbi gabiya gang'anambwiki kuba divai, nkolongu jola ngasejamanyiki pandu kojahuma divai, lakini atumisi babateka masi bamanyiki.



Ndienu akema mwanalomi jojutola mbomba jola, ampwagila, "Kila mundu jutumbuli kupia divai jejinoi oti, na bandu naanywii nakanopi ndi apia jejinyolwi. Lakini wehapa gubei divai jejinoga mbaka sajenu!"



Yesu jahenga nginyuli ja kwanza ku Kana kunkoa uku Galilaya, jalangila ukolongu waki na banafunzi baki batenda kunhobale.



Yesu ejajingala mu nyumba jaka Petili,  
jaakolila akowanu baka Petili agoni  
pikitanda abii na homa.



Ndienu, Yesu angusa nyongoo jola kuboku, na homa jela jatenda kukotoka, jatumbuliya kuntumaki Yesu.



Ekwahikila pakamii, bandu baaleta agonzu boa na bandu bababii ayokalani ni ilombu kwaka Yesu. Bandu bingi ba musu wegola bakusanyika pulubanza palongi ja nyumba.



Najombi Yesu jaalamisa bandu bingi bababii na magonzu gokapi, kabee jibenga ilombu hingi yeyabii yakamwi bandu. Ngasejiilekiti kupwaga sindu sokape ndaba yumanyiki jombi nyanye.



Bandu boa bapala kunngusa Yesu, ndaba makili gabia gumpita nkati jaki na kwaalamisa bandu boti.



Papuje mundu jumu jojulei bundeta kwaka Yesu koni buntotwi bandu nsesi.



Lakini ndaba ju nsambi wa bandu,  
ngasebawesiki kujingi nkate. Ndienu,  
bakwela panani ju nhagaa bahotula  
nhagaa nukunhulu jojulei we jola  
pikilanda ja bandu nukumbeka  
palongi jaka Yesu  
pamu nilipega  
laki.




Yesu ejukubona kuhobale kwabu, ampwagila mundu  
jojulei jola, "Mwanango,  
gulekakiwi mahakau  
gako." "Nugupwaagi,  
jema, jukua lipega  
laku, gujenda  
kunyumba jaku!"



Yesu pajajingala munhwatu banafunzi baki batenda kumpwata. Apalapa, gapitila majeba makolongu munhanga na masi gatumbuliya kuguyekale nhwatu. Lakini Yesu jabiya jugosi lugonu.



Lakini Yesu jwaapwagila, "Mwabandu bini lihobale lisokopi mwanganya, ndaba jaki ntenda kujogopa?" Ndienu, jajumuka jagalakaliya majeba makolongu gala nu nhanganga gola gwatuli nuu. Banafunzi baki basangi nukupwaga, "Jonioju we mundu bole? Hata unhwai na majeba gatenda kunzoanela!"



Ndaba Sapanga jaapai ngamaa bandu  
bupundema hata jaamua kumpia Mwana  
waki wakanzika, ili kila mundu  
joanhobaale ngajikuwe ila jubiya na  
womi wa masoba goha.



Aloma 3:23 Bandu boka atei mahakau nukupongukewa nu  
ulumbi waka Sapanga.

Aloma 6:23 Ndaba malepu ga mahakau ndi kuwa lakini  
nhupi jejupia Sapanga ndi womi wa masoba goti su kupete  
Yesu Kilisitu, Bambu witu.

Aebulania 9:27 Ndienu ngati ekubii kila mundu jukuwa  
mala jimu, ndienu jwiijema palongi  
jaka Sapanga kutemuliwa.

Aepesu 2:8,9 Ndaba, kwa uamboni waka Sapanga  
nkombuliwi kwi indela ju kuhobaleka. Lijambu le heli  
ngaselihikiki ndaba ju kuhenga lihengu ngani ila je nhupi  
pena kuhuma kwaka Sapanga. Ndaba ngaseihengiki kwa  
mahengu ginu henu jiikuba mundu ju kukipuna.



Aloma 10:9,10 Ana ujetaki kupete nndomu waku kupwaga Yesu ndi Bambu nuku hobale mu moju jaku kupwaga Sapanga anhyoa Yesu kuhuma kwa bandu baawi, wiitenda kuokoka. Ndaba mundu juhobale kwa mwoju nuku jetakewa kuba jwaamboni palongi jaka Sapanga, kabee kupete nndomu mundu jutenda kujetake kuhobale sukulonge, ndi jwiitenda kuokoka.

Yohana 3:16,17 Ndaba Sapanga jaapai ngamaa bandu bupundema hata jaamua kumpia Mwana waki wakanzika, ili kila mundu joanhobaale ngajikuwe ila jubiya na womi wa masoba goha. Ndaba Sapanga ngaseantumiki Mwana waki puundema ili jutemula bandu bupundema, ila jaakombula.



1 Yohana 5:11-13 Na malobi ge ndi ganga: Sapanga jutupekia womi wa yaka petapeta, na womi hogu gubii nkati jaka Mwana mundo. Mundu jokapi jojubii na Mwana waka Sapanga jubii na womi we hogu; na mundu jwanga kuba na Mwana waka Sapanga, ngasejubii na womi. Nunhandaki mwanganya majambu haga ili mmanya mmbii na womi wa yaka petapeta, mwanganya mo mulinhobale liina laka Mwana waka Sapanga.



Matei 8-9; Maluko 1-2, 4; Luka 4, 8; Yohana 2

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: E. Frischbutter; Sarah S.

Matengo Bible (mgv) ©The Word for the World International  
and Matengo Language Translation, 2020. All rights  
reserved.

<https://www.bible.com/bible/3941/GEN.1.MABV>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

